

मारवाड़ी तिमाई पत्रिका

अपोरो मारवाड़, अपोरी बोली

अपरेल ॐ जून-2018


nirmaan
empowering communities

संपादक

निरमाण सोसायटी-ओसियाँ,
जोधपुर



सुविचार

- 1- कोम करोध अर लोब ए तिनी ई नरग रा द्वार है-कबीर
- 2- उनो इज कोम सिध्द होवे है जको टेम ने ध्योन राख अन कोम करे-वृन्द
- 3- जिके ने हारन रो डर है उनी हार तै है-नेपोलियन



मुहावरा

1. री गधी पचिम री चाल- की नी होवे तोई दिखावौ करणो।
2. बोन्दरी हुती बिच्छू खागो- बिने मतळब रा चाळा करणा।



कहावते

1. बारे कोसो बोली पलटे फळ पलटे पाको, बुढापे में केस पलटे लखन नी पलटे लाखो।
2. खावणो माँ रे हात रो चाये जैर ई कियो नी हो, रेवणो भाईयो रे भळो चाये बैर ई कियो नी हो।

सरकारी योजना

कन्या सादी सयोगी योजना

इण योजना रे माई राज्य सरकार द्वारा गरीबी रेखा ऊ नीचे आळा परिवार यानी बीपीएल अनुसुचित जाति आळा परिवारो री छोरियो रे ब्याव वास्ते सरकार 5000 रुपियो री सहायता देवे है। ऐ रुपिया परिवार री पेली दो छोरियो रे ब्याव रे वास्ते देवे है।

इण योजना रो फायदो लेवण वास्ते फोर्म भर अन आपरे जिले रे जिलाधिकारी, सामाजिक न्याय एंव अधिकारिता विभाग (समाज कल्याण) में जमा करावणो है। बे नियमो अर निरधारित परक्रिया रे अनुसार सहायता रे रुपियो रो भुगतान री वैवस्था करेला।

कन्या सादी सयोग योजना रे तैत मिलणे आळा रुपिया।

- 18 साल री उमर में ब्याव करणे पर 20000 रुपिया
- दसवी पास करियो पछे 30000 रुपिया
- बी,ए पास करियो पछे 40000 रुपिया

फोर्म भरनो टेम

ब्याव ऊ एक महिनो पेली या ब्याव होयो पछी छे महीना तोई।

कन्या सादी सयोगी योजना रे वास्ते जरुरी कागद।

- राजस्तोन रो होवणो जोड़जे है।
- छोरी री उमर 18 साल या इणू सली।
- आ सहायता रासी परिवार री पैली दो टाबरो रे ब्याव वास्ते है।
- आय परणोम पतर।
- बीपीएल/अल्प आय/अनुसुचित जाति/ जनजाति रो परणोम पतर।
- आधार कारड।
- भामासाह कार्ड।
- बैंक डाईरी।



नीमड़े रा फायदा

- 1- नीमड़े रा काचा तीन-च्यार पता सुबे री टेम में भुखा पेट खावणे ऊ खून साफ होवे है अन पेट री बैमारियो ठीक हो जावे है।
- 2- सरीर में खाज खुजळी या एलर्जी हो जावे तो नीमड़े रा पता पोणी मे ऊबाळ अन ऊण पोणी ऊ सिनोन करने ऊ ठीक हो जावे है।

कहानी

जट्टे ना पहुँचे बैजगाड़ी उठे पहुँचे भारवाड़ी

एकर एक राजा ने कविता सूननो सौक लागगो। राजा आपरे दरबारियो रे खनु आपरी परजा में केवाड़ियो के जको मिनक राजा ने कविता सुणाई है अन जै बा कविता राजा ने पसन्द आ गी तो राजा उत्रे ईनोम देवेला। आ बात सुण परा अन घणी घणी भो रा कवि आया हाँ राजा ने कविता सुणावण रे वास्ते। राजा ने कविता सुणाई पण राजा ने एक ई कविता पसन्द नी आई। गोव रँ माई एक अदगेलो मिनक रेतो हो। उत्रे ई मन में जचगी के मैं ई राजा ने एक कविता सुणाऊ। एक दिन बो बैठो जणो एक कागलो मटकी माथै बैठो पोणी पीवतो हो अन आपरी चूच मटकी माथै घसतो हो। मिनक इण बात री एक कविता बणा अन राजा रे खन्ने गियो। दरबारी अन कवि ऊण मिनक ने देख न हसिया हाँ तोई बो मिनक राजा ने कविता सुणावणी सरू करी के “घस घस घसावै घस घस ढोळे पोणी अरे काळिया हमे मैं थारे मन री बात जोणी”। राजा ने कविता पसन्द आ गी। मिनक ने ईनोम दे दियो। एक दिन दरबारी भेळा हून राजा ने मारण री योजना बणाई। राजा री दाढ़ी बणावतो ऊण काळिया नाई ने राजा ने मारण रो केयो। नाई मोन गियो। काळियो नाई राजा री दाढ़ी बणावण ने गियो। काळियो नाई राजा रो गळो ब्राढणे रे वास्ते बैठो उस्तरो घस्तो हो। उण टेम राजा कविता पढणी सरू करी “घस घस घसावै घस घस ढोळे पोणी अरे काळिया हमे मैं थारे मन री बात जोणी”। इतो केवतो ई नाई तो राजा रे पगो में पड़ियो के बाबजी ओ कौम म्हारो नी है मने तो आपरा दरबारी केयो जणो मैं तो आपने मारण ने आयो हू। राजा मन में सोचियो के एक मुख री कविता किती कौम आई आज जान बचा दी।

चुटकला

1. ऊन्दरो

एकर एक ऊन्दरो जंगळ रे माई खातो खातो नावतो हो।
जणो केई जिनोवरो पुछियो भाई आज खातो घणो नावे है।
काई बात हुगी?
ऊन्दरो- अरे केवे जेड़ी बात कोनी।
जिनोवर- तोई बता तो दे भाई के होयो काई है?
ऊन्दरो- थोने ठा कोनी, काले एक सेर मर गियो है जको सैग म्हारे माथे सक करे है।

2. कलाकार

एकर एक लुगाई सत-संग में गी परी पुरी रात गावणियो रे सोमी ऊची हू हू अन देख बोकरी। सुबे च्यार बजियो री टेम में रोवणी सरू हुई। गावणिया मन में विचार करियो के विरह तो वाकेई ईयो मासा रे लागी है। कलाकार मासा ने पुछियो मासा रोया किकर। मासा केयो के कोई बताऊ भाई काले म्हारे तीन सौ लड़ा हाँ जको थोरे आळे दई बोकणियो रोग होयो जको सुबे री च्यार बजियो री टेम सैग मर गिया, जको थोरे ई हमे बा टेम होयोड़ी है।

सुविचार

1- अगियोनी हूवणो जिती सरम री बात नी है, जिती सिखण री इछा नी होवणी।

2- जे थे सुरज री जियो चमकणा चावो हो तो पैली सुरज री जियो तपणो सिखो- डा.एपीजे अब्दुल कलाम

लोकगीत

पंजाबी टूक

पंजाबी टूक मेरा दिल ले गया

मोटी मोटी ओखियो में आंसू दे गया

ओ जी ओ बन्ना म्हारा नवल बना दिलड़ो नी लागै आपरे बिना।

चाय बणाऊ थारी माता से कोप धुलाऊ मेरे हातो से।

ओ जी ओ बन्ना म्हारा नवल बन्ना दिलड़ो नी लागै आपरे बिना।

पाणीड़ो भराऊ मेरे हातो से मटकी धुलाऊ तेरे हातो से

ओ जी ओ बन्ना म्हारा नवल बन्ना दिलड़ो नी लागै आपरे बिना।

पंजाबी टूक मेरा दिल मेरा दिल ले गया

मोटी मोटी ओखियो में आंसू दे गया।

कपड़ा धुलाऊ मेरे हातो से साबण लगाऊ थारा हाता से

ओ जी ओ बन्ना म्हारा नवल बन्ना दिलड़ो नी लागै आपरे बिना।

रोटी बणाऊ मेरे हातो से सब्जी बणाऊ तेरी माता से

पंजाबी टूक मेरा दिल ले गया

मोटी मोटी ओखियो में आंसू दे गया

ओ जी ओ बन्ना म्हारा नवल बन्ना दिलड़ो नी लागै आपरे बिना।

भजन

मैं तो करूं अरज कर जोड़

मैं तो अरज करूं कर जोड़ सतगरू किरपा करी हद जोर।
टेर

सतगरू सुद-बुद्धी रो सार लकायो दुरमत दुर करी

गरू अपणाय सरणे राकियो सतगरू दया बिचारी

सतगरू जी रे रूप आया म्हारा गरू अवतारी।

म्हें सतगरू चरणो रिया बण चेला

म्हारा सतगरू री सेवा सदा है मेवा

चरण छोड नहीं जाऊ म्हारा गरूजी राखो चरणा माई।

सतगरू रे रूप आयो सावरो भाग भला जद दरसन पायो

भगत दीपाराम री भावी सत सबदो में जद सतगरू सरणो पायो

सतगरू रामप्रकास जी अमर है भाव भगती रो दियो।



पढाई री जड़ो भलेई खारी होवे पण फळ मीठा लागे है।

पतो

निरमाण सोसायटी

प्लेट नम्बर 3, तीजी मंजिल गुलाब कोम्पलेक्स

तहसील रोड़ सञ्चियाय हेण्डलूम के पास, औसियाँ

जोधपुर (राजस्थान) 342303

फोन नम्बर - 02922-274017

Email- rajasthanlanguages@nirmaan.org.in

Web- www.nirmaan.org.in

बणावण आळा:-

गंगाराम अर रतन लाल योगी

मदत करणाळा:-

मुकेश कुमार योगी अर कविता योगी